

Huufrouä Blues

text&music: Nic High

Das isch dr Huus Frauä Blues. Ehe! Das isch dr Huus Frauä Blues.
Wenn er Di packt und nümmi will lo goh
channsch nämmlig eifach grad wider vo vornä afo...
So so. Jäwohl!
Denn Du bisch ganz äläi dähäi.
Jedä Morgä brav uffschoh, Zmorgä machä, alli weggä,
denn die Chinder mien in d'Schuel goh.
Und denn putzä, ichaufä, uffrumä, chochä,
wöschä, fliggä, organisierä, telefonierä, schtaubsugä,
schissiputzä, abwäschä, et cetera et cetera.
Und alli die Sisifusarbet. Und sag mol hesch nid amigs au s'Gfühl,
das alles schtinggt mr mängisch au?
Und trotzdem, ich muess es machä, denn sunscht machts's jo niemerts
und als Dangg krieg ich nämlig nid ämol ä Lohn sondern högschtens no dr Hohn.
Und i kenn au keini Ferie meh, das het's sitterä Ewigkeit nümmi geh.
Jo das isch dr Huus Frauä Blues.
Er nimmt mr d'Chraft und d'Freud und sugt mi us.
Dr Huus Frauä Blues.

Well I woke up this morning u de bini go büggle so wie jede Tag.
I ha gschuffet u g'chrüpplet u büglet d'r lieb läng Tag.
U am Abe, woni de ändlech uff d'r Schnure bi heicho
isch d' Wohnig läär g'si and my Babe was gone...
Ufem Chuchitisch isch e Zedu g'läge, si syg wägg, si syg furt,
si heig d'Nase g'schtriche vou vom Huus Froue Blues.

Huus Froue Blues, de Huus Froue Blues.
O dä Huus Frauä Blues, es isch ä Gruus,
er nimmt mr d'Chraft und d'Freud
und sugt mi eifach wider ämol us,
dä ewigi Huus Frauä Blues.
I ha dr Blues i chumm jo sälber nümmi drus.
Was isch denn das, was isch mit mr los?
Ha das gar nid kennt, sonä Blues.
Aber jetzt, jetzt hanen, definitiv,
dr Huus Frauä Blues, ea, dr Huus Frauä Blues
ä Blues, blu blu blu blu blu Blues.
Huus Froue Blues, dr Huus Froue Blues.
Do am Tisch, ehea, und si findä mi Zmittag grusig, wää,
das wänn si gar nid ässä und was machi denn?
Es mues halt eifach si und s'chunnt immer wider irgend ä Kritik
und es hört gar nie uf und mängisch dänggsch,
dä chasch überhaupt nüt richtig machä.
Jedä het immer überall irgendwo öbbis ummä z'motzä,
es isch doch eifach wirklich zum chotzä
und denn paggt er mi wider, Shit, i hanen, dr Blues, es isch ä Gruus!
Er nimmt mr d'Chraft und d'Freud und er sugt mi us,
denn das isch dr Huus Frauä Blues.

I chas nid änderä. I gimmer Mieh und probiers immer wider vo neuem
und es goht wider besser oder ich raff mi wider uff
und überhaupt, dänggsch an nüt Böses,
s'goht dr guet, s'isch alles friedlich, s'laufft rund
und plötzlich machts „tschäbädäbung“ und er isch wider do. Yeah.
Er nimmt mr d'Chraft und d'Freud
und er sugt mi eifach immer wider us
dä Huus Frauä Blues. Yeah dr Blues!

S git immer wider die Momänt, do hänggts dr eifach us und dä kriegsch
dr Blues, yeah, dr Blues, dr Blues und nomol dr Blues
und nüt anders wie immer dr Blues.